

Headlines

1. समग्र शिक्षा दिएं कताबें च आपत्तिजनक सामग्री छापने आहले मामले च अज्ज त्रै प्रकाशकें गी हिरासतै च लैता गया ऐ।
2. रियासी जिले च दुनिया दा सब्भनं शा उच्चा रेल पुल अमरनाथ यात्रियें लेई आकर्षण दा केंद्र बना'रदा ऐ।
3. पुंछ दे डिप्टी कमिशनर होरें श्री बुड्डा अमरनाथ यात्रा दे इंतजामें दा जायजा लैता ते आखेआ जे उत्थें होने आली पूजा दा सिद्धा प्रसारण कीता जाहग तां जे दुनिया भरै थमां शिवें दे भक्त वर्चुअल ढंगै'नै एहदे च शामिल होई सकन।
4. राजौरी जिले दी तन्वी शर्मा नै मर्चेट नेवी च शामिल होइयै खित्ते दा नां रोशन कीता ऐ। ओहू राजौरी जिले थमां मर्चेट नेवी च शामिल होने आली जिले दी पैहली कुडी बनी गेइयां न।
5. ते मौसम विभाग नै जम्मू-कश्मीर दे केई सारे हिस्सें च अज्ज भारी बरखा बरने दी पेशनगोई कीती ऐ।

<><><><><><>

Publishers-Arrested

प्रति खूफिया इकाई नै जम्मू च जम्मू-कश्मीर च समग्र शिक्षा दिएं कताबें च गलत जानकारी ते आपत्तिजनक सामग्री छापने आहले मामले च जारी जांच दे चलदे त्रै प्रकाशकें गी हिरासतै च लैता ऐ। एहू कार्रवाई इस मामले च जम्मू ते दिल्ली च कन्नोकन्नी चला'रदी जांच दे सिलसिले च तालमेल बठाने लेई कीती गेदी ऐं गिरफ्तार कीते गेदे प्रकाशकें च आबराय बुक्स सर्विस थमां इंद्रपाल ते नोयडा दे डामिनेंट पब्लिशर्स दे अमरदीप ते गिरीष अरोड़ा जिनें कताबें गी लेइयै एहू सारा मामला चलै करदा ऐ ते पुच्छ पड़ताल कीती जा'रदी ऐ, उंदे च हिलाल अहमद ते संतोष मीणा आसेआ लिखी गेदी कताब पर्सनैलिटीज एंड लीजेंड्स आफ जेके ते सुषांत गिरी आसेआ लिखी गेदी ग्रेट पर्सनैलिटीज आफ जम्मू एंड कश्मीर शामिल न। पैहली कताब दे प्रकाश जम्मू दे आबराय बुक्स सर्विस जिसलै जे दुए कताब दिल्ली आधारित अनुराग प्रकाशन आसेआ छापी गेदी ऐ। होर मती जानकारी कन्नै स्टाडे जिला संवाददाताबाईट.....

<><><><><><>

Rail-Bridge Attraction

दुनिया दा सबनं शा उच्चा रेलवे पुल चिनाव रेल ब्रिज अमरनाथे दी जात्तरा पर आवा'रदे श्रद्धालुएं लेइ, इनें दिनें आकर्षण दा इक प्रमुख केंद्र बने दा ऐं कुदरत दे इक कोला बधियै इक शानदार नजारें दी गोदा च इंजीनियरिंग दे शानदार नमूने गी दिक्खियै हर कोई रहान ते खुश होने दे कन्नोकन्नी इस कमाल दी सराहना बी करा'रदा ऐ। मते सारे लोक उनें थाहरें पर रुकियै खूबसूरत नजारे दिक्खने लेई उत्सुक लब्धदे न जिथुआं नजारा दिक्खने लेई विशेष इंतजाम कीते गेदे न। किश यात्रिएं इस शानदार नजारे ते इंजीनियरिंग दे कमाल गी लिखियै अपने बचार इस चाल्ली रखेबाईट.....

<><><><><><>

Ayush Ramban

रामबन जिला प्रशासन दे सहयोग कन्नै आयुष मैहकमे नै श्री अमरनाथ जी जात्तरा आले रस्ते पर मुफ्त सेहत शिविर कायम कीते दे न। इनें शिविरें च डाक्टर यात्रुएं दा मुफ्त इलाज करा'रदे न ते उनेंगी सेहतमंद जीवन जीने लेई सलाह बगैरा देआ'रदे न। एहदे अलावा इनें शिविरें च मुफ्त दोआइयां बी उपलब्ध करोआई जा'रदियां न। रामबन जिला प्रशासन इस गल्लै पर पूरी तक्क रक्खा'रदा ऐ जे श्रद्धालुएं गी तौले मेडिकल मदाद हासल होई सकै। इस बारै होर जानकारी दिंदे होई आयुष ते सेहत विभाग दे नोडल अफसर डा. शकील अहमद होरें आखेआबाईट.....

<><><><><><>

Budha-Amarnath

पुंछ दे डिप्टी कमिशनर अशोक कुमार शर्मा होरें अज्ज सलाना श्री बुड्डा अमरनाथ जी दी जात्तरा गितै तैयारिएं दा जायजा लैने लेई जिला अधिकारिएं दी इक बैठक दी अध्यक्षता कीती। बैठका च अधिकारिएं दे अलावा श्री बुड्डा अमरनाथ जी मंदर दी प्रबंधन कमेटी दे मिम्बर बी मजूद हे। उंदे अलावा यात्रा दे आयोजन कन्नै जुडे दे केई संगठनं दे प्रतिनिधि बी इस जायजा बैठक च शामिल होए। बैठक दरान यात्रा तैयारिएं दे बक्ख-बक्ख पैहलुएं पर सोच-विचार कीता गेआ। इक महत्वपूर्ण घोशणा करदे होई एह जानकारी दित्ती गेई कि श्री बुड्डा अमरनाथ पूजा दा सिद्धा प्रसारण कीता जाहग तां जे दुनिया दे बक्ख-बक्ख हिस्सें च रौहने आहले शिवभक्त बी एहदे दर्शन करी सकन। आकाशवाणी कन्नै गल्ल करदे होई डी.सी होरें आखेआ

<><><><><><>

BBBP-Scheme

केंद्र सरकार आसेआ अपनाई गेदी बेटी बचाओ बेटी पढ़ाओ योजना दा असर हून राजौरी दे सरहदी ग्राएं च बी दिक्खने गी लभा'रदा ऐ। इस पैहलकदमी राहें हासल होए दे मौकें दा पूरा-पूरा लाहू ठोआंदे होई राजौरी च कब्जा रेखा कश इक ग्रांS दी 18एं ब'रें दी तन्वी शर्मा नै मर्चेट नेवी च शामिल होइये इक शनदार उपलब्धि हासल कीती ऐ। एहदे कन्नै गै ओहू मर्चेट नेवी च शामिल होने आली राजौरी जिले दी पैहली कुडी बनी गेइयां ना। उंदी इस उपलब्धि पर ना शड़ा उंदे परोआर गी सगुआं पूरे पीर पंजाल खित्ते गी गर्व मसूस होआ ऐ। आकाशवाणी समाचार कन्नै गल्ल करदे होई तन्वी शर्मा होरें आखेआ

<><><><><><>

Dairy Enterprenure

दूढ निश्चय ते सरकार दे सहयोग थमां प्रेरित होइये उधमपुर दे कोटली बाला ग्रां दी निशा देवी होरें अपने आपै गी इक गृहणी थमां इक कामयाब डेयरी उद्यमी दे रूपै च तब्दील करी लैता ऐ। आई.डी.डी.एस डेयरी यूनिट स्कीम दी मदद कन्नै उनें 14 गवें कन्नै अपना डेयरी फार्म शुरू कीता हा। अज्ज इस फार्म च 20 शा मती साहीवाल गवां न जेहदे कन्नै हर रोज 100 लीटर कोला मता दुध उत्पादन हुंदा ऐ। अपनी आमदन बधाने आस्तै निशा होरें हून देसी घ्यो ते उधमपुर दे जी.आई टैग आहली रिवायती कलाडी बी बनाना शुरू कीती। अपना तजुर्बा सांझा करदे होई निशा देवी होरें आखेआबाईट.....

जिसलै के उन्दे पति जुगल किशोर होरें आखेआबाईट.....

<><><><><><>

Weather (Byte)

मौसम विभाग नै जम्मू-कश्मीर च ताजा बरखा ते अंधी-झक्खड़ पौने दी पेशनगोई कीती ऐ। मैहकमे दा आखना ऐ जे प्रदेश दे मते सारे हिस्सें च अज्ज भारी बरखा पेई सकदी ऐ। मैहकमे नै इस दरान खतरे दी शेंका आले इलाकें, खासतौर उप्पर चिनाS घाटी ते पीर पीर पंचाल खित्ते च चानचक्क हाड़ औने ते ल्हास पस्सियां पौने दी चेतावनी जारी कीती ऐ। मती जानकारकी कन्नै मौसम विभाग दे डरैक्टर मुख्तार अहमद(बाईट)

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 ब'रें धोड़ी दी उम्मी दे इच्छुक मेदवारें कोला दरख्वास्तां मंगियां ना।

कैजुअल न्यूजरीडर-कम-ट्रांसलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़्ज़ फी मिंट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001' दे दफ्तरै च (दस्ती) जमा करोआनी होग। एहदे कन्नै सबबै जरूरी दस्तावेज ते आवेदन शुल्क बी होना चाहिदा (जेहड़ा वापस नेई होग)।

सामान्य श्रेणी दे मेदवारें लेई एहू शुल्क 355 रपे ते एस.सी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एहू शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: **SBIN0000657** ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्नै जरूर होनी लोडचदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><>